

**Lavè la dlijia:** düc chi che po, ëi y ëles, mo dandadüt i **geniturs di mituns che va chësc ann ala Prüma Comuniun**, é invià a gnì en mercui, ai 14.05.2014 do mëssa a lavè la dlijia.

**Gita dles ëles:** la Uniun Ëles de Badia inviëia dütes en mertesc, ai 27.05.2014 ala gita al Durnholzersee te Sarntal scomencian cun na s. Mëssa a Neustift. An pëia ia dales 07:00 dan Comun a Pedrases. Gnide tröpes y prenottesse cina ai 24 de mà al nr. 0471/839842 (Maria).

**Pelegrinaje a Maria TRENS** en sabeda ai 24 de mà organisé dales Patrones de Suedtiroal adöm cun nosc vëscio Ivo Muser. Les patrones dess se anunzié cina ai 20 de mà al nr. 0474/590026.

**Inrescida:** le Raiun Sozial Val Badia/Sorvisc soziai fej na inrescida por les porsones che fej le guern a familiars a cïasa, por capì y podëi valutè damì la situaziun. Le chestionar é anonim. I formulars é da cïafè te Raiun Sozial, tles apoteches, ti ambulatori dles infermieres o dales assistëntes che vëgn te cïasa. Prëibel dede jö i formulars anter i **30 de mà 2014** te Raiun Sozial, te Cïasa de palsa, ti ambulatori di doturs o dles infermieres. Dilan a düc chi che fej para.

**Informaziun dal Comun de Badia:** la proscima incuntada cun la popolaziun gnarà tignida en lönesc, ai 12.05.2014 dales 20:00 tla cïasa dles uniuns J.B. Rinna a San Cïascian. Düc i zitadins dl comun é dër bel invià a tó pert, cun osservaziuns y propostes!

**Referat:** la Uniun dles Ëles inviëia a na sëra de informaziun sön l'tema "*Jì sigüsc sö por munt*" cun Ingo Irsara en jöbia, ai 15.05.2014 dales 20:00 te Cïasa Runcher.

**La Uniun Ëles Artejanat** mët a jì en mercui, ai 14.05.2015 na sëra cun Ariane Alfreider dal tema "*Idees, techniches y problematiches di cïavëis*" Informaziuns y prenotaziuns al nr.338/3767410.

#### **Referac sura la sanité:**

Lünesc, 12.05.14 a La lla te scola mesana cun dr. Konrad Steinhauser dales 20:00: "*Artrose und Rheumatismus*"

Mercui, 14.05.14 a Badia te Cïasa Runcher cun dr. Silvana Campeï dales 20:00: "*Le monn dl'ëra*"

Vëndres, 16.05.14 a S.Cïascian te Cïasa Rinna cun dr. Peter Mazzurana dales 20:00: "*Il consumo di alcol e droga*"



Tel./Fax 0471 839571 - E-Mail: [parrocchiabadia@libero.it](mailto:parrocchiabadia@libero.it) - [www.valbadiaonline.it](http://www.valbadiaonline.it)

Nr. 24

Edema: 11.05. - 18.05.2014

### **Vangele dla Dumënia che vëgn - V de Pasca - Ann „A“**

#### **Dal vangele do San Jan**

14,1-12

Te chël tēmp à Gejù dit a sü discepui: sc cör ne se lasces nia turbè. Cherdede te Dî y cherdede te mè! Tla cïasa de mi Pere é l tröpes abitaziuns. Sc'ara ne foss nia insciö, ves essi dit dailò: I va a ves arjigné ca n post? Canch'i sarun jü y ves arà arjigné ca n post, vëgni indò, y i ves condüjji da mè, por ch'i séise incé os, olache iö sun. Y olache iö va – chël tru conescëise pö. Tomesc ti à dit: Signur, i ne savun nia olache te vas. Cò désson pa spo conësce le tru? Gejù ti à dit: Iö sun le tru y la verité y la vita; degügn ne röia dal Pere ater co tres mè. Canch'i m'arëis conesciü, conesciarëise incé mi Pere. Bele ségn le conescëise y l'ëise odü. Filipus ti à dit: Signur, móstresse le Pere; chësc nes basta. Gejù ti à respognü: Bele tan dî sunsi pro os, y te ne m'as nia conesciü, Filipus? Chël che à odü mè, à odü le Pere. Cò sciàfieste pa da dî: Móstresse le Pere? Ne creïeste nia, che iö sun tl Pere y che le Pere é te mè? Les parores che iö ves diji, ne diji nia da mè infora. Le Pere, che é te mè, ademplësc sües opres. Cherdédeme pö, che iö sun tl Pere y che le Pere é te mè; sce nia, spo cherdede almanco por gauja dles opres! Amen, amen, i ves diji: Chël che creï te mè, fajarà incé les opres che iö feji, y al nen fajarà ciamò de maius, deache iö va dal Pere.



#### **Gottes Segen zum Muttertag!**

Seine mütterliche  
und väterliche Liebe  
begleite Sie  
alle Tage  
und gebe Ihnen Kraft  
in Ihrem Dienst  
an der Entfaltung des Lebens!





## FUNZIUNS SACRES

### 11.05. IV. DUMËNIA de PASCA - Ann A

#### *Dé Mondial dles Vocaziuns – Dé dla Uma*

- 10.00 Mëssa por la Comunità  
14.00 Prozesciun a Oies por perié do vocaziuns  
18.00 por i novic Moritz Irsara y Karin Costa  
†to siur Laurënz Irsara / †to Bruno Valentin

### 12.05. Lünesc - *Mëssa cun i crejimà y düc i studënc*

- 20.00 †ta Paola Valentin da Pransarores (dala Uniun Èles)  
†ti Maria y Franz Irsara de Jan  
†ti dla fam. Davide Campeï

### 13.05. Mertesc

- 20.00 Devoziun de mà ( arjignada ca dal cor "Kèrygma")

### 14.05. Mercui - *Mëssa cun i scolars*

- 07.30 †to Herbert Costa  
†ti dla fam. Paul y Ida Valentin  
vis y †ti de Lois y Maria Tavella

### 15.05. Jöbia

- 20.00 *Liturgia dla Parora*

### 16.05. Vëndres

- 07.30 †to Erich Canins - aniversar  
†tes Anna y Rosina Piccolruaz - aniversar  
por la fam. de Maria Nagler Valentini

### 17.05. Sabeda

- 14.00 Mëssa da noza de Moritz y Karin Irsara  
16.00 Mëssa a Oies  
20.00 Devoziun de mà (arjignada ca dala Schira Jonila)

### 18.05. V. DUMËNIA de PASCA - Ann A

#### *Festa dla Prüma Santa Comuniun*

- 09.45 Dan calonia: salüt y ingrès te dlìjia di comunicanc  
10.00 Mëssa cun i mituns dla 1. Comuniun y families  
18.00 †ti Majo Alfarei / aniversar y siur Heinrich Valentin  
†ta Carmela Thaler  
†ta Emma Valentin Frenademetz



## Dala VITA dla CÛRA



La proscima **Preparaziun al Bato** vëgn tignida en sabeda ai 17 de mà dales 15:00 ales 17:00 te calonia a Al Plan. Invià é geniturs che à na creatöra da batié, sciöche incé totes y tòc. S'anunzié pon pro Annamaria Complojer al nr. 334/6102551.

**Bato:** ai 21.04.2014 à ciafè l'Sacramënt dl **BATO** l'pice Emil de Konrad Tavella y Chiara Ortolan da Peslalz. Al pice che tolun so cun ligrëza te nosta comunité cristiana y a sü geniturs les mius audanzes.

**La "Crusc dla Jonëza":** tratan chësc mëis de mà passa por l'decanat Val Badia la "crusc dla jonëza" metüda a jì dala SKJ da Balsan. En chësta dumënia, ai 11.05.2014 dales 14:00 gnarala portada sö Oies cun la prozesciun por perié do vocaziuns.

En vëndres, ai 16.05.2014 dales 20:00 sarà l'ora de Taizè a Oies olache la crusc gnarà surandada ai jogh da La Val. Düc, dandadüt i jogh, é invià a tò pert chisc dui dis.

**Cresimanç:** i geniturs di mituns che jarà l'proscimo ann a confermè é invià en lünesc, ai 19.05.2014 do mëssa da sëra te scola elementara.



**Incuntada di leturs y cantors dla Val Badia** en sabeda, ai 24.05.2014 a La Val. Se abinun dales 14:00 dan dlìjia por jì a öspi sö S. Berbura y dedò spo tla Ustaria Pider. Prenotesse çina ai 15.05.2014 pro Zeno ([zeno.tolpeit@dnet.it](mailto:zeno.tolpeit@dnet.it)) o te calonia da La Val.

**Sacramënt dl Öl Sant:** recordun che en mertesc, ai 20.05.2014 sarà dales 14:00 la Mëssa cun l'Seniorenclub olache al gnarà dè l'Öl Sant.

**"Nachtwallfahrt":** l'unìun omi Val Badia inviëia düc i ëi en mertësc ai 13.05.2014 dales 21.00 a Porsenù ala prozesciun cun l'internes o çiadëres (da se tò para). An paia ia da Porsenù (Parkplatz – Aquarena) dales 21.00 y an va çina a Neustift, olache al sarà na S.Mëssa cun Siur Tone Fiung. Dala Val Badia jarà n pulman (da Pedraces demez dales 18:50). Düc i interessà é perià de se anunzié pro l'surastant dl païsc o pro Salvester Vittur al nr. 3337247516 çina en dumënia ai 11 de mà 2014.

**Woche des Lebens:** dai 17 ai 24.05.2014 sarà a Maran y Balsan santes mësses, funziuns y n referat cun Birgit Kelle. informaziuns ciafëise te calonia o sot [www.bewegung-fuer-das-leben.com](http://www.bewegung-fuer-das-leben.com)